

太平天国資料匯編

中華書局

K254.6/2 D461/08

太平天国歷史博物館編

太平天国資料匯編

第三冊上

中華書局

# 太平天国资料汇编

(第二册上、下册)

太平天国历史博物馆编

中 华 书 局 出 版

(北京王府井大街36号)

新华书店北京发行所发行

四川新华印刷厂印刷

850×1168毫米 1/32 31<sup>1</sup>/<sub>8</sub>印张 710千字

1979年11月第1版 1979年11月成都第1次印刷

印数: 0,001—12,600册

统一书号: 11018·784 定价: 3.45元

中興別記

李濱撰

《中興別記》六十一卷，清上元李濱撰。此據宣統三年鉛印本排印。據作者自序，採錄官私材料約二百餘種，用編年體，起道光十六年三月，訖同治三年九月，記太平天國史事較為完備。目錄原在俞樾書信後，現據此次排印分冊情況分別改排在每冊的內封頁後。

古餘仁兄公祖閣下：未接芝儀，欣通蘭訊，並賜讀大著，其中與別記，似長編體例，采輯繁富，敘次詳明，洵足以昭得失之林，爲後事之鑒。其茶讌禮，竟如讀儀禮一篇，所附諸考，又如讀考工記，此等文章，漢以後無人能到也。弟年衰學退，事冗心粗，謬竊虛名，豪無實際，不足副下問之懷，有望洋向若而已。手肅，敬請升安。

治愚弟俞樾頓首

古餘仁兄公祖閣下：覆讀大著，文繁事賅，具見蒐羅之富，編纂之精，真近代一大著作，必傳無疑。弟於此素未留心，竟無從贊一詞，偶籤出二、三十條，不過校核於字句之間，於全書無足輕重也，聊副來意，卽繳還鄴架。手肅，敬請升安。

治愚弟俞樾頓首

# 太平天国資料匯編第二冊上目錄

總類 專著 記事

中興別記目錄

上元李濱古餘譔

|     |                           |     |
|-----|---------------------------|-----|
| 卷一  | 起道光十六年丙申三月訖道光三十年庚戌十二月凡十五年 | 一   |
| 卷二  | 起咸豐元年辛亥正月訖九月并閏凡十月         | 一九  |
| 卷三  | 起咸豐元年十月訖二年壬子六月            | 三五  |
| 卷四  | 起咸豐二年七月訖十一月凡五月            | 五三  |
| 卷五  | 起咸豐二年十二月訖三年癸丑正月           | 六八  |
| 卷六  | 咸豐三年二月                    | 八二  |
| 卷七  | 起咸豐三年三月訖四月凡二月             | 一〇三 |
| 卷八  | 起咸豐三年五月訖七月凡三月             | 一一八 |
| 卷九  | 起咸豐三年八月訖九月凡二月             | 一二九 |
| 卷十  | 起咸豐三年十月訖十一月凡二月            | 一六〇 |
| 卷十一 | 起咸豐三年十二月訖四年甲寅正月           | 一八〇 |
| 卷十二 | 咸豐四年二月                    | 二〇〇 |
| 卷十三 | 起咸豐四年三月訖四月凡二月             | 二二四 |

|      |                 |     |
|------|-----------------|-----|
| 卷十四  | 起咸豐四年五月訖六月凡二月   | 二二三 |
| 卷十五  | 起咸豐四年七月訖閏七月凡二月  | 二四九 |
| 卷十六  | 起咸豐四年八月訖九月凡二月   | 二六六 |
| 卷十七  | 起咸豐四年十月訖十一月凡二月  | 二八一 |
| 卷十八  | 起咸豐四年十二月訖五年乙卯正月 | 二九六 |
| 卷十九  | 咸豐五年二月          | 三一二 |
| 卷二十  | 起咸豐五年三月訖四月凡二月   | 三二八 |
| 卷二十一 | 起咸豐五年五月訖六月凡二月   | 三四二 |
| 卷二十二 | 起咸豐五年七月訖八月凡二月   | 三五七 |
| 卷二十三 | 起咸豐五年九月訖十月凡二月   | 三七〇 |
| 卷二十四 | 起咸豐五年十一月訖十二月凡二月 | 三八四 |
| 卷二十五 | 起咸豐六年丙辰正月訖二月凡二月 | 四〇〇 |
| 卷二十六 | 起咸豐六年三月訖四月凡二月   | 四一七 |
| 卷二十七 | 咸豐六年五月          | 四三八 |
| 卷二十八 | 起咸豐六年六月訖七月凡二月   | 四四九 |
| 卷二十九 | 起咸豐六年八月訖九月凡二月   | 四六三 |
| 卷三十  | 起咸豐六年十月訖十一月凡二月  | 四七八 |

# 中興別記卷一

上元李濱古餘譔

道光十有六年

春三月，癸巳，宣宗申諭：各直省稽查會匪，毋得諱匿及藉端需索。是時兩廣總督鄧廷楨、廣東巡撫祁墳、廣西巡撫惠吉。上帝教匪首洪秀全傳教於桂平、武宣交界鵬化山，巨目楊秀清、馮雲山、蕭朝貴、韋昌輝、石達開、秦日昌六人佐之招誘。洪逆，其先廣東廣州花縣祿埗山人，徙居廣西桂平大黃江思旺墟。父國游，母李四妹，皆早死。秀全兄弟三人，最少，長仁發，次仁達，異母產。家業農，秀全棄而讀，爲人面頰高頰，頭少髮，體肥碩，性狡黠無賴，嗜飲博。廣西故多會匪，秀全以爲無足惑人，乃之廣東澳門，得外洋耶穌教書，歸詭言己爲天父耶火華次子生世，以耶穌爲天兄。謂天下當大亂，惟七日一禮拜上帝，得免劫難。斂香鐙貲，人歲納銀五兩，煽惑鄉愚，召納奸宄。凡人教者，不祀祖宗廟神，無人倫之敘，男皆稱兄弟，女皆稱姊妹。不遵正朔，造僞曆書，單月三十日，雙月三十一日，立春、清明、芒種、立秋、寒露、大雪俱十六日，餘俱十五日，號爲天父排定。禮拜日率衆跪誦。所爲贊美經云：贊美聖神風爲聖靈，贊美三位爲合一真神。真道豈與世道相同，能救神靈，相臨無窮，智者躍踴，接之爲福，愚者省悟，天堂路通。天父鴻恩，廣大無邊，不惜太子，遣降凡間，留民代贖，吾儕罪孽，人知悔過，魂得昇天。其詞極鄙悖，且隨時更易，有新舊贊美之名。秀清原名嗣龍，其先湖南耒陽人，父大朋，以罪流廣東嘉應，至秀清轉徙廣西桂平，種山燒炭。身中，面瘦微髭，性奸譎，以洪逆託諸天父天兄，輒自作巫，詭

稱天父降附其身，誦發人之陰私，杖責之。且令洪逆前跪，數其過授杖，或暴已過，顛仆令人撻之。於是教黨詫爲神奇，益懍服，洪逆遂倚重之過於他酋。雲山名渙，以字行，與洪逆同里，知文義，爲邨塾師，教中散劫真言歸元寶誥諸邪說，半出其手。朝貴，武宣大黃江新墟人，貌惡性悍，且多力，耕牛脫紉逸畔，追握其尾，牛從之倒行，洪逆妻以妹宣嬌。昌輝原名正，桂平金田邨人，家饒田產，納粟爲國學生。體短婢，面白高額，疎鬚眉，性陰柔險惡，以貨入教。父元玠，兄賓，弟俊，塾師黃啓芳，篋帳羅苾芬，其鄰曾錦譚皆入教黨。洪逆屬啓芳、苾芬司筆札。啓芳，鬱林博白人，體碩性暴。苾芬，嘉應人，私販鴉片於潯，梧間，事覺，亡命桂平，韋逆納之。達開，廣東和平人，徙桂平白沙，或曰居貴縣。體碩面黑高額，微髭稠髮，目光兇射，富而好勇，蓄養武士。兄祥貞，族兄鳳魁皆以貨入教，妻黃，教黨玉崑女也。玉崑與洪逆爲中表。有閩商過境，聞達開名，乞選徒衛之，盜偵知之，率百人來石家，達開關門召人曰：商持金乞衛，吾卻其餽而許之，今壯士來，吾當厚遺，請姑免商，可乎？盜義之。再讓，受其半而去。後生辰治具歡賓，盜亦往爲壽，仇家發其事，官捕達開繫之，教黨賄謀釋之。玉崑，籐縣人，或曰桂平大黃江人。識字，結吏役攬訟事，魚肉鄉里。日昌原名日剛，桂平白沙人，或曰貴縣人。充縣署民壯，以事斥革，入教。

夏四月，癸亥，召惠吉來京，以直隸布政使梁章鉅爲廣西巡撫。

六月，癸丑，上以各省將弁好尚文藝，懈惰操練，諭督撫訓誡大小營員，消除舊習，實力校閱，不悛改者，指名參奏。

道光十有七年

是年，上帝教匪洪秀全年二十有七，自潯州應童子試，被黜。歸病，數日不食飲，忽蹶然起，自云與上帝飲博甚樂，助之兵，與閩浮提王戰，大勝。聞者盡駭，謂秀全果天授也。

道光十有八年

春二月，乙巳，調祁墳爲刑部尚書，以江蘇布政使怡良爲廣東巡撫。是年，廣東、廣西盜會諸匪漸起，上帝教匪洪秀全託演卜，往來兩省，轉相勾結。

道光十有九年

冬十月，丙寅，上命各省學政恭刊聖諭廣訓，頒行各學生童。壬辰，頒欽定黜異端以崇正學四言韻文。

十二月，癸亥，朔。調鄧廷楨爲閩浙總督，以欽差大臣湖廣總督林則徐爲兩廣總督。

道光二十年

秋九月，林則徐以事革職，遣戍伊犁，以大學士琦善署理兩廣總督。先是，則徐焚禁鴉片，停英咭喇互市，英夷以兵船犯廣東海口，擊敗之，改犯浙海寧波等處。樞臣疆吏皆議啓海釁，則徐拜疏請治罪，於是撫議起，則徐獲革戍之罪。粵民謠曰：百姓怕官，官怕外夷。撫議既定，粵民積不能平，以夷人要求入城，謀起而拒之，大府亟榜示慰民，又從而謝止之。又謠曰：官怕外夷，外夷怕百姓。論者以爲能怕其官之所怕，則民浸浸乎玩官於股掌，外患弭而內患作，恐不遠矣。

道光二十有一年

春二月，琦善以事革職逮問，以刑部尚書祁墳爲兩廣總督。

三月，丁卯，調梁章鉅爲江蘇巡撫，以刑部右侍郎周之琦爲廣西巡撫。

秋八月，丁酉，命怡良赴福建查辦事件，以廣東布政使梁寶常署巡撫。是年，廣東、廣西盜會諸匪日甚，越南貢使船次桂平，東匪掠於石嘴河，竄貴縣。代理知縣聞寶桂率兵勇勦捕，獲匪首楊亞丙等於石龍墟，解省正法。

道光二十有二年

春正月，丙辰，調怡良爲閩浙總督，實授梁寶常廣東巡撫。

冬十二月，己亥，調梁寶常爲山東巡撫，以江蘇巡撫程喬采爲廣東巡撫。是年，上帝教匪洪秀全以英夷要撫後，益窺營務廢弛，陰以兵法部勒教衆，倚楊秀清爲統轄。洪逆自傳教以來，人皆稱爲洪先生，地方有司聞之，不之禁，方謂是教而未爲匪也。

道光二十有三年

是年，廣西潯、梧間盜會諸匪益肆，各屬團練守禦。上帝教匪洪秀全等蓄謀觀釁，獨不欲早發。其黨頗衆，一時與團練并稱曰團黨，教黨，而有司若無聞也。

道光二十有四年

春二月，戊戌，朔。祁墳以病免，以欽差大臣兩江總督耆英爲兩廣總督。是年，上帝教目馮雲山傳教於潯州紫荊山，主中表盧六家。廣州一帶匪衆焚掠無忌。

道光二十有五年

春正月，庚子，調程喬采爲漕運總督，以廣東布政使黃恩彤爲巡撫。

六月，京朝官奏廣州府屬盜匪日滋。戊午，諭耆英、黃恩彤督飭所屬緝捕，寬籌經費，嚴定章程。是年，上帝教匪洪秀全主簾縣中表黃玉崑家，適其鄰首玉崑教黨，逮繫於縣，秀全爲之賄釋。一日，秀全至紫荆山西北象州，州官爲廟神製袍，方禮獻，秀全率教黨褫裂之，壞神偶，題詩於壁，觀者如堵，州官不敢與較。

道光二十有六年

春，廣西盜匪掠橫州北流等處，臨桂縣知縣王淑元偵有妖巫惑衆，密陳巡撫，謂速發禍小，請急治之，周之琦難之。

冬十月，丙申，周之琦病免，以福建布政使徐繼畬爲廣西巡撫。辛巳，諭耆英飭督糧道黃宗漢會布政、按察兩司各巡道議辦保甲，以清盜源，各屬水陸交界增設巡船。

十二月，癸丑，黃恩彤以事革職，調江寧布政使徐廣縉爲廣東巡撫。丙子，調鄭祖琛爲廣西巡撫，徐繼畬爲福建巡撫。祖琛，字夢白，浙江湖州人。喜談時藝，闇於吏治軍政。時有小人，語以盜會諸匪當謀解散，勿輕以兵事勞宸慮。祖琛惑之，且溺佛，以殺人爲不慈，於是文武益承指塗飾。廣東欽州匪首秦興晚，即沈香晚，託賣藥至廣西賓州，勾結莠民。

道光二十有七年

春，廣西匪焚掠平樂、陽朔。

冬十月，戊申，御史張寶璣奏各省州縣吏役縱匪殃民，請飭查懲辦。諭各督撫嚴定緝捕章程，以除莠安良爲心，毋得藉口積重難返，畏難苟安。己酉，諭京師及各省編查保甲。辛巳，諭鄭祖琛會湖南

軍勦匪雷再浩、李輝於新寧、全州交界，廣西軍敗匪雷再浩於全州咸水口。是冬，上帝教匪目楊秀清謀襲掠桂林，臨桂縣知縣王淑元獲匪謀李嘉瑞、事洩，請兵出縛匪黨多人。巡撫鄭祖琛不欲究叛，懼窮治激變，飭以盜具獄，斬嘉瑞等數人，餘悉釋之。先是，淑元嚴保甲，李嘉瑞以形迹異逮鞫，承盜不承叛。有他犯洩其謀者，且詳言屯伏近郊。淑元急白巡撫，祖琛疑不實，力爭，始許以兵出捕，既獲多名，而祖琛卒堅持論盜不論叛。廣西軍敗湖南道州匪於灌陽，湖南軍捕誅匪首雷再浩，而道州匪黨猶衆，鄭祖琛奉旨遣軍防堵邊隘。

十二月，甲戌，召耆英來京，以徐廣縉署兩廣總督，布政使葉名琛護理巡撫。是月，桂平生員王作新等首上帝教匪曾玉珍、馮雲山於縣署，知縣王烈批辭左之。雲山赴訴，拜上帝無罪，請究誣控。作新等狀云：爲結盟藉拜上帝妖書，踐踏社稷神明，乞恩嚴拏究辦事。緣曾玉珍窩接妖匪，至家教習，業經兩載，迷惑鄉民，結盟聚會，約有數千人。要從西番舊遺詔書，不從清朝法律，膽敢將左右兩水社稷神明踐踏，香鑪破碎。生等聞此異事，邀集鄉民耆老，四處觀查，委實不差。至十一月二十一日，齊集鄉民，捉獲妖匪馮雲山，同至廟中，交保正曾祖光領下解官。詎料妖匪黨曾亞孫、盧六等搶去，冤屈無伸，只得聯名稟叩。伏乞嚴拏正辦，俾神明洩憤，士民安居，則沾恩無既。烈批辭云：閱呈殊屬昏謬，該生等身列膠庠，應知條教，如果事有實蹟，則當密爲呈稟，何得輒以踐踏社壇之故，捏飾大題架控，是否挾嫌滋累，亟應澈底根究。候卽嚴提兩造人証，質訊確情辦理，以遏刁風而肅功令。雲山訴呈云：爲遵旨敬天，不犯不法，乞究索詐誣控事。中有云：一切上帝當拜，古今大典，觀廣東禮拜堂懸挂兩廣大憲奏章并皇上御批移文可查。教人敬天，不意被人誣控。又援詩書稱上帝者二十餘條，以證無罪。

道光二十有八年

春三月，秦興晚糾賓州匪首黃啓珍赴武宣合陳亞潰劫掠脩仁、荔浦。是時上帝教匪目馮雲山赴潯州上控王作新特衿橫囓，架題尋害，請飭縣提訊雪冤。知府顧元愷批檄解縣查訊，桂平縣知縣賈某諱匪，以游民移遞雲山原籍具獄，後作新家族八十餘人皆被害。賈令移文云：案據敝縣大黃江巡檢查獲無業游民馮雲山一名到縣，當經訊供係廣東花縣人，並無爲匪不法情事等供。據此，查該民既無籍游蕩，應即遞籍管束。文託巡檢查獲，遂混作新首匪原案。雲山，其先花縣人，徙桂平有年，自來遞籍者無實際，非途逸即遁還也。

夏四月，乙卯，申諭兩廣、湖南、江西各督撫飭捕會匪。桂平匪貴孫等掠有賫家子弟勒贖，所過墟市，肆索銀米。

五月，京朝官奏廣西教匪、會匪、盜匪各股，日甚一日，諭鄭祖琛嚴飭營縣緝治，毋爲不肖屬吏欺蒙。

六月，丙午，命耆英留京管理禮部事務，實授徐廣縉兩廣總督，以葉名琛爲廣東巡撫，李璋煜爲廣東布政使，鹽運使趙長齡爲廣東按察使。

七、八月間，廣西官兵敗匪於賓州、桂平，竄來賓，知縣某獲匪首黃啓珍、秦興晚，伏誅。

冬十一月，壬申，鄭祖琛奏遵查北流等處劫案已獲，分別嚴辦，地方安堵。得旨：不可一奏了事，務要嚴密訪緝。是年冬，廣西官兵擊桂平匪貴孫等不利，游擊鄧宗恆陳亡，賜卹如例。

道光二十有九年

春三月，兩廣總督徐廣鎰咨署提督祥麟，會鹽運使徐有壬勦陽山、英德匪，歷二月，平之。

秋八月，平南生員胡某等首上帝教匪韋昌輝於縣，知縣某不敢緝治，上控潯州，知府顧元愷檄桂平縣知縣倪濤遣役杜雲、周貴捕繫之，既有結保者，遂釋。潯州協副將李殿元聞人言濤受賄，心艷之，率兵赴金田追捕，濤不得已，亦率巡檢張鏞往會於韋家祠，逮昌輝，不服，笞之。教黨以竹插門，嚮晚鳴鑼縱火，殿元、濤聞變跳免。鏞伏轎中，有以矛刺轎者，遂創死。後以陳亡請卹如例。

秋九月，全州匪助湖南匪李沅發陷新寧，戕知縣萬鼎恩，復與靈川等匪合勢。湖南巡撫馮德馨、提督英俊督軍攻勦，鄭祖琛遣軍扼邊隘，鼎恩賜卹如例。

冬十月，廣西提標游擊段丙南等擊匪於遷江隆安，敗死之，賜卹如例。鄭祖琛奏劾左江道南寧府知府張熙宇、左江鎮標都司何廷標捕勦不力，均摘頂戴。

十一月，癸亥，湖南官兵克新寧，匪首李沅發遁廣西全州。是月，廣西南寧城守營都司盛鈞招撫橫州匪首張家祥，更名國樑。國樑，字殿臣，廣東高要人，來貴縣傭工。爲人貌秀美，武勇多力，嗜賭博，浸流爲盜，然所犯多土豪倚貨而暴者。一時爲之語曰：狼如狼，怯如羊，扶弱鋤強張家祥。糾結欽州李自昌、橫州謝江殿、靈山蘇三相、貴縣徐亞雲等匪，踞橫州大灘伏波廟，勒徵商船，官兵擊之，家祥竄賓州，勢益張。時南寧匪長腰四、潘七大等作亂，兵力不能兼顧，盛鈞遂議招撫，既國樑謁按察使勞崇光，一見歎異，以將才許之。

道光三十年

春二月，癸酉，文宗以道州匪屢犯廣西龍勝及貴州邊，嚴旨責湖廣總督裕泰勦匪不力，革提督英

俊、永州鎮總兵雙德等職。命廣西提督閔正鳳赴龍勝堵剿，貴州巡撫喬用遷遣軍扼邊隘。是日，調四川提督向榮爲湖南提督。己未，兵部右侍郎趙光奏陳時務四端，吏治日壞，武備不修，緝捕廢弛，虧空累積，請亟整飭。上命各直省督撫提鎮按照摺內所陳，認真講求。是時貴州防邊軍拒敗新寧匪，竄廣西修仁、永福，湖南軍會廣西軍追斬匪目李恭照等於修仁。

夏四月，丙寅，內閣侍讀學士董瀛山奏江蘇淮安、直隸天津、靜海、滄州、山東滕、嶧、蘭山等處教匪，以盜賊爲生業，竟至父子傳習，師徒授受。近來廣西、貴州均有大夥劫搶拒捕之案，直隸、山東均有劫奪齋本摺差之案，請飭部嚴定交界協緝章程，奏入，下部議行。丙戌，以廣西按察使勞崇光爲湖北布政使，暫留廣西剿匪。是時湖南新寧匪首李沅發成禽，奏報肅清。上命檻至京師，盡法處治。晉加裕泰太子太傅銜，鄭祖琛、喬用遷以會勦功，賞加太子少傅銜，與向榮、閔正鳳、貴州提督秦鍾英，均交部從優議敘。

五月，丁酉，給事中黃兆麟，庚戌，候補四品京堂李純先後奏廣西匪黨猖獗。鄭祖琛迭奉嚴旨，實力查緝，切勿稍存諱飾。廣西匪股肆擾各府之最著者，慶遠則有張家福、鍾亞春，柳州則有陳亞潰、陳東愚、山猪羊，武宣則有劉官方、梁亞九，象州則有區振祖，潯州則有謝江殿，其他南寧、思恩、太平等匪黨亦衆。其黨分廣馬、土馬，大股數千，小股數百。是月，柳州匪陳亞潰等四路焚掠，廣西提督閔正鳳駐柳州閉處不出。英德匪李泳酬卽元寶亮擾光治，官兵擊之，竄廣西懷集，謀取道連山、連州，進犯湖南。巡撫駱秉章咨署永州鎮總兵谷韞璨，會永郴桂道張其仁防堵江華，檄各屬團練協防。

六月，庚寅，徐廣縉、葉名琛會奏廣東、廣西教會匪情勢云：該匪祖孫傳習，師徒授受，雖遇案懲辦，